

KLEINMOND NAWEEK

Dag 1: Saterdag 3 Junie

Kogelberg tot Harold Porter

Stappers:

Carl & Sandra Lombard

Gerrit & Erna Kritzinger

Terence & Elanie Poultney

Sean & Hannelize O'Kennedy



Saterdagoggend so rondom 10:00 het ons begin stap vanaf die Kogelberg natuureservaat se nuwe kantoor. 'n Mens stap verby hul eco-friendly village (eintlik huisies wat 'n mens ten duurste kan huur) en dan lei dit jou op in 'n pragtige kloof deur 'n inheemse woud tot bo op die nek/vlakte. Van daar gaan die paadjie oor 'n vlakte, deur 'n kloofie en dan op en om 'n hang tot bo Bettiesbaai. Die roete af is redelik styl aan die begin voor dit begin zig zag by die voet af tot in die Harold Porter Botaniese Tuin.

Bo-op die nek het Carl ons gewaarsku dat ons gaan wind kry, maar ek dink nie een van ons het verwag die wind gaan ons van ons voete af waai nie. In die middel van die vlakte het ons eers gestop by 'n bruggie en in die beskutting van die bosse 'n teetjie en middagete geniet. Onder in die tuin het almal eers 'n yskoue bier by die restaurant geniet. Ons tydsberekening was net reg, want net toe ons by die huis stop, het die reën begin val.



Hannelize het van die paadjie af gewaai

Saterdagagaand het almal heerlik gekuier voor die kaggel by die Lombards se huis op Kleinmond terwyl Terence vir ons gebraai het onder die sambreel in die reën.

Dag 2: Sondag 4 Junie

Drie Susters

Sondagoggend was die meeste van die groep nie lus vir bergklim nie en het net Carl kans gesien om vir my en Terence te lei op die Drie Susters roete. Die wind het darem bedaar van die vorige dag, maar daar was steeds 'n koeligheid in die lug.

Die Drie Susters roete is 'n sirkelroete wat begin aan die agterkant van Kleinmond en wat dan geleidelik klim tot bo op die derde suster (die hoogste van die 3 pieke). Die roete bied pragtige uitsigte op die see asook die groen berge in die binneland.

Van bo die 3^{de} piek stap jy dan weer geleidelik af aan die anderkant af tot op 'n kontoerpad wat jou dan terugneem na die beginpunt. Die kontoerpad lei jou deur 'n pragtige proteawoud wat die hele hang van die berg bedek.



Artikel deur Elanie Poultney